

کرا کیپ

محمد الصایغ

obeikandi.com

كرايب

محمد الصايغ / كاتب مصري

الطبعة الأولى عام 2016

ISBN978-977-6445-65-9

رقم الايداع/10442/2016

All rights reserved. No part of this book may be reproduced, stored in retrieval system, or transmitted in any form or by any means without prior permission in writing of the publisher.

جميع الحقوق محفوظة. لا يسمح بإعادة إصدار هذا الكتاب أو أي جزء منه أو تخزينه في نطاق إستعادة المعلومات أو نقله بأي شكل من الأشكال، دون إذن خطي مسبق من الناشر.

غلاف : NileDesign.com

دار الابداع للنشر والتوزيع

موقع دار الكتب

أبراج عثمان- كورنيش المعادي

القاهرة - مصر

هاتف: 01002052266

E-mail: info@daralkotob.com

www.daralkotob.com



دار الكتب

Daralkotob

کراکیپی



دار الکتب

Daralkotob

obeikandi.com

بحمد ربى ومش هعرف اكفيه حمد.  
إهداء...

اهداء لوالدي ووالدتي اهداء  
لكل حد عبرت عنه في أي فكرة كتبتها  
وأصحابي باختلاف الاسم الى البنت اللي  
حبتها لكل حد ساعدني وكان جنبي  
اهداء لكل فكرة كتبتها ووعدها  
مسيرها يوم تشوف النور أديني وفيت.

obeikandi.com

## التعريف بالشاعر

انا العادي واكل كمان  
انا ابسط بني الانسان  
وعاقل بس في جناني  
يعدي جناني أي جنان  
انا شرحي يطول في سنين  
وممكن كلمة توصفني  
انا بس اللي اعرفني

obeikandi.com

## وصف حالة

ارتفاع ضغط المشاعر  
فرحة بيضيها خوف  
لهفة على ضعف وتردد  
لسه بعتب على الظروف  
ان هي سر حالتي  
ان هي معجزاني  
سارقة احساسني وارادتي  
عاملة مني حد تاني  
فجاة مش فاهم حكايتي  
كلام واحد ضعيف تافه  
مالوش قيمة  
اعلن استسلامه  
ولسه حرب احلامه  
بتبدأ لسه قدامه.  
وصرخ قال مش لاعب  
لاورح فيها  
عشان فكرة ماليش فيها  
ياعم وايه يحلي الحلم  
غير تعبك على وصوله  
ولحظة تطير من الفرحة  
لما تشوفه وتنوله  
ومش عايش عشان فكرة

طب عايش اساسا ليه  
وخايف لسه من بكرة  
بقولك اهدى واظمن  
بكرة للي بيسعى اليه.

obeikandi.com

# الوصية

انا مسافر

بلاش تنسيني وانا غايب  
سيبلي حاجة للذكرى  
لا و الله ما انا سايب  
هسيبك اغلى من قلبي  
وهمشي في البلاد بلا قلب  
ماهو الي يفارق احبابه  
يستاهل يشيل الذنب  
و اياكي دموع الفراق  
اياكي بعدي حد يلمح ضحككتك  
فستانك الاسود بتبقي فيه اميرة  
نهارك زي لونه  
لو شافه عليكي غيري  
ينفع وانتي اميرة  
يشوفك حد غيري  
واياكي تنسي... مكياجك الميه  
ونسيم الصبح  
اياكي بالمره تحطي الكحل  
وافتكري روعي مكان ما كنا بنلتقى  
وزورى امي  
بتشوفني فيكي  
وقلبها بيرتاح

بس مش يعني الخروج  
في أي وقت مباح  
اتحمليني بغير عليكي زيادة  
لحد ما ارجع  
خلي الكلام ده قانون  
وافتكري دائماً  
ان انا مجنون  
لو توحشيني تانى يوم هرجع  
لو حتى ايه هيكون.

# قصة شعرها

وقالت هتسى كل حاجة بعدها

خصلة جراح

خصلة أم

خصلة وداع

خصلة ندم

قصتني خصلة ضمن ترتيب جرحها

معرفش ليه حسبتني منهم

كأني ماضي وانتهى

سكت لا

عاتبتها

انا مش خصلة شعر هتخلصي منها

انا ميت قصة وصورة بعينها

يعني تشوف نفسها

هتشوفني

يوم ماتحب اني اخرج منها

خلوها تغير شرايينها

تلقي لقلبها نبض جديد

يومها انا هفرح

واخذ جنب

قبل ما اسيبك

هنقذ خصلة مالهاش ذنب.

obeikandi.com

## ابتسامة

ابتسامة عايشة راضيه يادوب وساكتة  
بس نفسها تبقى ضحكة  
تبقى ضحكه طالعه صافية  
مش راسمها عشان مجاملة  
ضحكة مستنيه فرحة  
فرحة آه لو تبقى كاملة  
ضحكه مش بدارى بيها... حزن ساكن  
ضحكة باهته ولونها داكن  
تبقى ضحكة عدمها احسن  
تفضل احسن ابتسامة.

obeikandi.com

## ورقة

رافضة منهم اي شفقة  
اتشخبطت واتلونت  
واتكرشمت واتبهذلت  
متغيرتش وكملت  
فضلت طريق للناس تعبر بيه  
تعاتب حد  
تفرح حد  
تخرج حاجة من جواك متقلشي  
تقطع فيها من غضبك  
متزعلش  
وتفرح لما تكتبها كلام فرحة  
وتفرح لما ترسمها كلام احلام  
قصيدة حب لحيبتك  
كلام غنوة سابتلك مرة يوم ذكري  
كلام يوصل لاحبابك يطمنهم  
كلام يفضل بينك بينهم  
في قلب الورقة مداري

obeikandi.com

## حبیبتن

شمسها كانت عينيك

كانت بتحلّم من كلامك

كانت تغنى ما بين ايديك

كانت بتتنفس غرامك

حبیبتنك...

حضن دافي في عز بردك

قلب كان عايش لسعدك

حلم بنت بيت وبكرة

كان في ايدك تحت امرك

مد ايده يضم ايدك ملقهاش

انسف قصور حلمي

ودمر ذكرياتي

خوفي تضيع مني

نساك قيمة حياتي

تعبي عشان راحتك

وراحتك كسرتي  
مبقتشي اشوف بعينيك  
ورايحة اشوف حياتي  
نسيت دموعي  
وكل جرح جرحته فيا  
خلاص كفايه قلبي مش ناقص اذيه  
هحاول افرح بالى باقي في حلمي ليا.

## واحدة طيبة

قد ايه الدنيا قاسية

فيها ناس بيجرحوا

واحدة في طبيتها

قاعدين وكل همهم

هيا وسيرتها

هيموتوا على نظرة رضا دائماً في عينها

فاكرينها تملك كل حاجة

يكونون في عونها

محسودة علشان طيبة

وراضية بالقليل

كل شيء في عينها جميل

في عز حزنها تبنتسم

ولو لفيتها بتنقسم

يبقى حمل اكيد ثقيل

انسانة مش عارفين قيمتها

بس هيا مشكلتها

فاكرة زيها طيبي  
تمد ايدها بخير كثير  
تستنى يرجعلها  
وتنام ياعيني كل يوم  
ودموعها على خدها  
تنام وتصحى تاني يوم  
الضحكة مالية وشها  
هي كده لغز وكبير  
ماحد عارف حلها.

# ضحكتها

بلاش ضحكتك دلوقت  
انا زعلان ومتعصب  
ومش هعرف اقول حرفين  
وانتي بتضحكي قصادي  
غلطتي وجاي نتحاسب  
واخد موقف واكون جامد  
ضحكتي نسيت  
غلطتي في ايه  
نسيت نفسي وبقول اسف  
مفيش مرة اكمل زعلي للاخر  
مفيش قوة قصاد الضحكة دي تكمل  
انا نفسي اعاتب بس لو فاكر  
كلام قبل ماتضحك ليا واسلم  
مفيش بعد العيون دي فيه كلام يتقال  
وازاي بعد اما تضحك

يجي اي عتاب  
وازاي بعد اما تفرح  
تفتكر في عذاب  
كلام ضحكتها  
امر وواجب التنفيذ  
برغم ان عليها حاجات  
حقيقى تغيط  
لكن بعشقها وعنادها معايا لذيذ  
بلاش الضحكة دي تغيب عني لو ثانية  
انا معرفش اشوف من غيرك الدنيا  
ضحكتي الشمس بتنور  
فرحتي تفرحي الدنيا.

## انا نسيته

نسيت ايامها وكلامها  
وضعف عنيا قدامها  
نسيت ضحكتها لمستها  
وناسي كل تفاصيلها  
خلاص مبقتش احلها  
اكيد كداب  
وطعم الدنيا من غيرك مالوش معنى  
بتوحشني حاجات كانت بتجمعنا  
ولمسة ايد تظمني  
وبيت بكرة هيجمعنا  
وجودي معاك يكملني  
بعادنا كتير مالوش معنى  
كداب ولسه ايديا دفيانة بايديهي  
تايه طريقي في الحياة رسماه عينيها  
وهي الدنيا والاحلام عشانها غنايا وكلامي  
ولو سلمت للنسيان  
ما كنت لقيت حبيب تاني

obeikandi.com

# كوكب جديد

ثبت علميا في عقلي  
استحالة اني اكمل ثانية واحدة  
في قلب كوكبكوا السعيد  
ايوه مغرور اطرودوني  
صنفوني بعلمكم كائن غريب  
رافض حياتكم وطبعكم  
اعلن العصيان عليكم  
وعنده كلمه بس ليكم  
ايها الشعب الحبيب  
اتولدت في ارضكم  
وانا كنت مسلوب الارادة  
لا اخترت اسمي ولا مكاني  
كان امرى ليكوا  
وكنت بتمنى السعادة  
تسمحولي الوقتى اقرر  
ايه مصيري

هسيب في كوكبكم الرشيد  
مكان لغيري  
كرهت غلافكم الجوي  
خلاص الجو مش جوي  
نفاق وخداع وكذب وظلم  
وطبقة همجي مخرومة  
وقالوا الاسم مش علمي  
وقلنا اوزون  
ياخلق دي مش قضية اسم ومصطلح  
القضية  
بعادنا عن رب البرية  
مبعدهش يوم حد وفلح  
وقف بيجو  
خرجنى من كوكبوا يابنى  
انا عندى اعيش على الشمس لحظة واتحرق  
ولا انى اعمر بالسنين  
في مكان رافضني.

## سندباد

سندباد فاشل بليد  
مسافرش ولا لف البلاد  
مقصدش ابداء سندبادهم  
اللي مالي الحواديت  
كلامي كان على انه سندبادي  
اللي قولت عليه بليد  
سندباد خايب  
وحساباته غلط  
معرفش يوم طعم المخاطرة  
علطول مسلم نيته  
قالوا عبيط  
بس هوه مش عبيط  
ده معاه ماجستير في العبط  
لو عقله كان عادى وبسيط  
كنت قلت اني ظلمته  
لان اصلا دي طبيعته  
لكن سلامة نيته  
وطيبته وضميره  
حاجات تعباه ومسيره

يقول كفاية  
استني بكرة اسمعها منه  
يقول هينسى جوه منه  
سندباد بائس عنيد  
ينسى كل شيء في ثانية  
وقت ما بتنشف دموعه  
يرجع العادى البليد  
هوه منطق  
هو اسلوب للحياة  
هوه ايه فسري طبعك  
عقلي مني راح بعيد  
هوه اسلوب سندبادي  
عندي سكاني وبلادي  
بصنع الافراح بايدي  
واطرد الاحزان وقادر  
ابني في الحلم الجديد  
وهوه ده السر يا حضرت.  
ان انا علطول سعيد

# قواعد لغة

علومنا العربي

باصوله وقواعده

علمونا النحو

وعرفنا خلاص فوايده

اعرب يامصري

كلمة شعب

في اي قطعة في اي درس او امتحان

الشعب دائما مفعول به

دائما مهان

مفعول به علطول

منصوب عليه

من اي حرف جر

يحكمه ويجر فيه

نعم يامصري

نعم ياخويا

الكلام ده في اي قاعدة و اي صرف

و نحو اتعلمته فين

الكلام ده في حكم بلدى  
في نحو بلدي في عرف بلدي  
قول امين متقولش ليه  
ياوطن بشوفك مبتدأ  
ليه شايطني مضاف اليه.

# عم فرح

ما بينا كام فدان وبحر  
وبعدى مش محتاج لشرح  
دى حاجة كانت مفروضة فرض  
والاختيار ده مش عشاننا  
ياعم فرح  
ياعم فرح بس مالك  
قاصد تبعد ليه بلادك  
كل اما اقرب خطوة ليك  
تبعد مكانك  
هوه انت كاره فرحتي  
ولا الرزالة شيء في طبعك  
قاصد تزهب حضرتي  
ياعم فرح  
اليأس كاس  
مش بحر هشرب منه وحدي  
ولا انت ناسي دور لناس  
وجاي تعوض فيا وحدي  
ياعم فرح

دي مش اصول  
قولتلنا نصبر  
صبرنا ياما ومش هقول  
ده الصبر زينة  
عمال تدور ضرب فينا  
وتقولي لو تصبر تنول  
شبعنا من كتر الكلام  
كفاياك تقول

# شبه ميت

يعنى من غير روح

وحاسس

يعنى اعمى

ولسه شايف

يعنى واحد قلبه واقف

لسه عايش

عنده احداث الحياة

فيلم بيتفرج عليه

كل علمه ومعلوماته

ان دي احداث حياته

قدره كان لازم هيحصل

عمره مدخلش فيه

هوه صابر

قد صبره قد أمله

قد عشمه في الحياة لو يوم تفجأه

ان فيها جديد عشانه

جديد جميل يقلب كيانه

يوصل الاحلام في خطوة

يحضن الاحباب في لحظة  
يمسح الحزن المغيم  
يرسم الضحكة أليى ناقصة  
ايوه متعشم في فرصة  
مش كتيرة عليا خالص  
مش هتعمل يعني كارثة  
مش هسلم مش هسيبها  
مش هرد لحلمى باب  
هفضل اهتف ويوم هنولها  
فرصة دي ولا سراب

# دولاب ذكريات

دولاب ذكريات طفلة

بقت دلوقتي

مش طفلة

اميرة كبيرة وجميلة

بقت قمرة

لكن بتحن وبتحلم

ترجع ذكريات طفلة

طفلة اكبر همها

عروستها تبقى في حضنها

وحلمها اوضة مليانة بلعب

حضن بابا

وهوه جاي من الشغل ميت من التعب

قلب ماما

يدق خايف من القلق

عندي امتحان

وصورة تجمعني بصحابي

وحشاني ملة زمان  
كل ده وتفاصيل كثير جوه الدولاب  
مشتاقة للطفلة اللي فيا  
مشتاقة للحلم اللي غاب  
نفسى اعمل ذكريات  
احداث وناس  
زي طفلة قلبها زي القمر  
نفسى اخرج بره مني واعيش حياة  
شوفتها في البوم صور

# تعرفيني

من ملامحي من موافقي  
من كلامي من قصايدى  
من شوية شخبطة  
رسمت حكايتي  
!! فاكرة فعلا تعرفيني  
انا كل ده واكثر كمان  
انا العاقل وانا المجنون  
واضعف حد ممكن اكون  
وممكن برضه اهد الكون  
وقلبي تحت انقاضه  
وممكن نظرة من عينك تدوبني  
وممكن لو هتنساني  
اسيبك قبل ما تسبيني  
المستحيل  
معرفش في يوم طريقي  
انا اللي اليأس استسلم في احباطي.

انا اللي بوصف فيكي  
ببنيني بلون فيكي من دمي  
وشايف فيكي من امي  
حاجات تشبها تشبهني  
اغير فيك تغيرني ده مسمحولك  
ومسمحولي  
بس الصح في الاول  
انك جد تعرفني.

# انتحار فكرة

ممکن سهل تتصدق

لكن قتل فكرة..!

ده ضد العقل والمبدأ

صعوبة قتل فكرة

صعوبة لمس ذرات الهوا

انتحارها بارادتها

بكامل عقلها وصوتها

شيء محتمل

لكن تقتلها تمسكها

تغيرها تبدلها

استحالة بجد يحصل

لو صاحبها بجد صمم

وصدقها وعاشت فيه

وعاش ليها

وقرر قلبه يحميها

ودخله جوه تكوينه

يمشي الخطاوى طريق  
مكتوب على جبينه  
يموت هو  
تعيش الفكرة في اصحابه  
في حواديته  
في كلمة قالها لحبيته  
في اصراره تكون الحلم  
والفكرة كيان ملموس  
ياقادر ناوي وتكمل طريق الحلم  
يا اما ضعيف وشايفه كابوس  
واصعب معركة ياضعيف  
تهزم في الضلوع ضعفك  
قرر تبقى وهتلقى  
قلوبنا كلها في صفك.

## طريقة حب

أتجراً أحيانا أعلم  
وقمر ثواني و لم اكتب  
في أميرة أحلامي شعرا  
أتجراً يخدعني خيالي  
انساي يا حبيبي ثواني  
اه بتحصل عادى وايه يمنع  
نسيان صحي وعمره ما يوجع  
انا دواوين الشعر في حبك  
بتكفيكي لحد ما يرجع  
اتأمل عيناي وأسرح  
أتعلم أتألم أفرح  
أتغير وأذوب  
وأرجع أتجمد  
عيناكى سحر لا ينفذ  
اتمالك نفسي واققر  
كفى عن سحري ارجوي

وأدعو من قلبي لا تسمع  
خايف لتصدق تهجرني  
تنساني او تزعل مني  
في الفصحى كلامي ياحبيني  
للقافية بس ومش أكثر  
مش ليكي ولا ينفع اقوله  
تبعدي سحر عيونك عني  
تبعدي روحي  
تقتلي قلبي  
لكني أتعجب حقًا  
من خصلة شعر تقصدني  
تتعمد حقا تؤرقني  
تخفي عيناكي لثوان  
مع كل هواء يصدمني  
يتحرك شعرك اتحرك  
وكأني دمىة بخيوط  
تتحرك بأوامر منك  
بس أنا مش خيالك

ولا هبقى على كيفك

انا حنة منك

انا من اصل تكوينك

انا طيفك

انا ضلك

وحبي اغلى مافاضلك

انا الضحكة اللي معمولة

عشان خاطرك

انا الفرحة اللي مقسومة

عشان قلبك.

انا من وسط كل الناس

مجنون بيكي وبحبك.

obeikandi.com

# حرب حياة

استسلم.....

بين كل مواطن ضعفك  
قولي الناس والعالم ضدك  
وانك بقى بتعافر وحدك  
ضد الموح ضد التيار  
قولي انا ليه علطول مخصوب  
امتى هقرر يوم واختار  
امتى هقابل حلمي واشوفه  
امتى هيطلع ليا نهار....؟؟  
عمر نهار ما طلع لضعيف  
او مستسلم او مهزوم  
شجرة هزيلة في عز خريف  
اول هوا يصدمها تروح  
هوه الحلم هيرضى بضعفك  
ولا هيرضى يكونلك بيت  
انت عبيط  
متخيل هتعيش على كيفك

مبتسعاش ولا خطوة بجد  
والحلم يدور على طيفك  
يقلب على معاليك الارض  
يوصلك وانت هتتمنع  
مش عايز تنجح بالغصب  
انت بتقرا حكاوي كتير  
فيلم خيال علمي واساطير  
حتى قناة ديزني وكرتونك  
لو بتصدق  
كان بطوط ده زمانه وزير  
انسى وفوق  
خلى الحلم ده ابعد نقطة  
في آخر الكون  
وانت هتوصل مهما يكون  
عمر الحلم مايجي لعندك  
لازم تجري  
واوعى تصدق  
لو هيقولوا  
الحلم ديلفيري.

# الكيمياء في وصف اميرة الدنيا

اتحاد ذرات رقيقة  
ضحكة حلوة  
ثاني اكسيدها الجميل  
تخلي معمل قلبي ضايع  
جوه تركيب قلبها  
أكسجينها ايوه بتنفسها هي  
أكسجينها خاص بيا  
جوه تكويني وجيناتي  
ساكنة قلبي وفي عنيا  
فيه توافق غير طبيعي  
هي عنصر لا فلزي  
قلبي مش قادر يقاومه  
قلبي سايب معمله  
وقاعد يحايله  
ارجوك تفاعل ويا ذراتي  
انت روعي ودينيتي

وعنصر حياتي  
اسمحي لي اشرحلهم  
سر انجذابي  
سر تكوينك يا حلوة من كتابي  
الكيمياء في وصف اميرة الدنيا  
ذرات الطبيعة بتتجمع  
في ملامح وشك وعينيكي  
وانا قلبي حافظ هيسمع  
العدد الذري لمعالكي  
أتخيل معمل من غيرك  
أنا بيته هتموت من الوحدة  
وعناصر مش لاقية تفاعل  
ويبانوا ألوانهم باهتة  
حبيبتني الدنيا دي من غيرك  
تبقى الكيمياء مجرد مادة.

# علم الحساب

اجتهدت وكنت نابغة  
شلت فيكي ياأغلى مادة  
اربع سنين  
عمرك سألتيني في مرة  
اختلفنا اناوانتي فين؟؟  
اختلفنا انك انتى محددة  
اجابات وحيدة  
خانقة ابداعى وخيالى  
خانقة افكارى الفريدة  
بكره روتين خطوات حلوك  
بكره جذورك  
بكره ايجاد الزاوية  
بألف خطوة ومشكلة  
يااخوانا ما الموضوع في ثانية  
يخلص بحتة منقلة  
الموضوع عمره ما كان شخصي

ارقامك على عيني وراسي  
انا بس بترجم احساسني  
وانا مستسلمتش وبحاول  
ادوني تفاضل وتكامل  
شرفنا عوض اللي فات  
دخلوا عليا بلوغريتمات  
نزلت مني دموع عبرات  
ينفع اجيب مجموع بالماينص  
ليه دائماً متعشم فيا  
استاذ الجبر ان انا جينيس  
صدقيني  
حاولت احبك  
حاولت اشوف  
القوس بيحضن كل شيء  
العدد الموجب والسالب  
والقريب والغريب  
والأس التكعيبي قريبي  
والاله الحاسبة انا بعشقها

بحضنها وحافظ زرايرها

شفت كوزين تان

حنيت لايام زمان

كداب مفيهاش كلام

علم الحساب له ناسه

وخلاصة الكلام

انا ممكن اعمل اي حاجة

ولا ترجع دي الايام.

obeikandi.com

# فاكر.....

شمس بتطلع كل نهار

تسأل عنك

ودعتنا ولا انت مسافر

فاكر نور قلبك والضحكة

كانت بتنور قد الشمس

يمكن اكثر

فاكر شخبطك على ورقة

كل كلامك فيها وحشني

حتى الورقة كمان سألتني

راح فين الحبر الي ملاني

حب وفرح واحلام تاني

فين حركة ايدها ولمستها

فين كلماتها الي بتسحرني

لو شوفتها بلغها عنى

لسه سطورى الي بتوحشها

بتسأل عنها  
لسه محدش رغم الغيبة  
بيملي مكانها  
ذكريات ورقة معاي  
مش راح احكي في ذكرياتي  
انتي لو مش فاكرة اصلا  
خسارة فيكي كلماتي.

# تفاصيل شخصية

مجنون كبير

يحزن اوي يضحك كثير

أصعب مواقف عادي

تعدي بابتسامة

مشهد في فيلم

ممکن اوي تنزل دموعه

افعاله طفل

ويبان من الحركات بتوعه

حساس اوي

ويموت ولا يوريك دموعه

الكلام ده حاجة مني

بس مش كله انا

طاقة أمل

أشجع شجاع على أرضها

أضعف ضعيف

والياس داري ومسكني

عائش بطل  
بيشق للاحلام طريقها  
داق الفشل  
سلم في اول يوم وسابها  
انا اللي شرحي يطول كثير  
وانا المفيد المختصر  
انا الجريء وبحبها  
وخجول اقولها في وشها  
انا اللي ابعده من خيالها  
ومن هدومها اقربلها  
انا اللي مظلوم من بلادي  
كتبت شعر في عشقها  
انا اللي شايفاني غريب  
مع اني حته منها  
وحكموا بالاعدام عليا  
بقتل الفكرة جوايا  
وماتوا وفكرتي عاشت  
واديني حكنتي في حكاية

## مالهاش وصفة

عايز ترضي كل الناس  
ترسم صورة جميلة في عينهم  
تفضل محبوب دايمًا منهم  
مالهاش وصفة

فرضا انك طيب عاقل  
هادي ومسلم وخدم  
عايش بتوزع في سعادة  
حب الغير عندك عادة

عايش ليههم

مش ممكن

برضه هترضيهم

مش بطلب منك تاذيهم

او تجرحهم تيجي عليهم

او تبقى ساذج مستسلم

وتسيب حقد عطلول ليهم  
متفرطش في شىء من قلبك  
ولا تتلون الوان ليهم  
ربك اولى بالرضا منهم  
قادر وحده يغنيك عنهم .

# مجنون

انا الفكرة الي فيها الروح  
وقادرة تبقى موجودة  
انا الشمس الي جوه الليل  
والوان تانية مش سودا  
انا اللغز الي متحلش  
واكثر حد يوم حبك  
انا قلبي كتاب مفتوح  
ومكرهش في يوم قدك  
انا المجنون  
بحب بكل ما فيا  
وانا العاقل  
كتبتك قصة منسية  
ما بين اوراقى ودفاترك  
مسحتك زي مارسمتك  
وكنتى زمان في عيني الحلم  
بقيتى ماضي ونسفتك.

obeikandi.com

# تمثال شمع

أملك تكويننا بشريا  
ملامح تشبه انسان  
محفورا وجهي بعناية  
ابداع انامل فنان  
تفاصيلي صنعت ببراعة  
أقرب للواقع ان كان  
أتجرد من كل الحس  
أتألم بالشكل خداع  
دوري في الاصل دراميا  
أدواتي فن الاقناع  
اتلون في الغالب فرحا  
تبعاً لمزاج الفنان  
لكني أتقنت الحزن  
ساعدي صديقا انسان  
انسان قرر يفكرني

اني كمان انسان  
ماليش في الحب  
والطيبة و الاحلام  
كائن عديم المشاعر  
مع ان اصل المشاعر  
من اختراع انسان.

# بنت بصفائر

فاكرة امبارح

يابنت بقصه و صفائر

فاكرة الشقاوة

وضحكت قلبك الطاير

قلب كان دافي وبسيط

مش شايل اي هم

حياته لعبه وصحابه

وحلم عمره يبقى ام

فاكرة يابنت عروسة الباربي

والوانك

ورباط شعرك البني

فاكرة كلامك

عن مكان انتي اميرته

وحبيب يكون امير زمانك

متبطلش كلام في سيرته

فاكرة يابنت

كل الكلام والحكاوي

والهزار

لمة الصحبة زمان

والنميمة والنقار

فاكرة يابنت

بفكرك

خليكي بنت في مظهرك

ازيائك الدين والحياء

ساعتها نعرف جوهرك

## نصيحة

حلمتك حلم عدائي  
وحسبة فشلت في حسابها  
خسرتك حتى وخسرتك  
مش من حقي انطقها  
مكنتيش ليا من الاول  
عشان اقول خسرتك يااااه  
ولو عنها راح اتكلم  
هقول متشكرين يا حياة  
فهمت الدرس  
وهكمل تجارب فيكي للاخر  
اكيد هتعب وهتحمل  
وهكسب خبرة في الاخر  
وهوصل بكرة وهلاقي  
حلم يليق لي على قدي  
وهاخد بالي وافتكروا  
ياللي هتحلموا بعدي

obeikandi.com

# محاكمة شخصية

زى ما تقول الكلام

مبقاش يآثر

مبقاش يعبر

مبقاش يغير

شيء من الحال

ومن المحال

أعرف طريق يوصل لقلبك

ومعدهوش

بس الكلام مبقاش يفيد

بعد اللى صار

وفر كلامك

مفيش طريق يوصل لقلبي

مبقاش فيه قلب

واخر ريشة رسمتني

ضيعت حتى الملامح

تعرف تسمعني كلام  
ميكونش جارح  
ساكت !!! فهمت  
كلام الفرح راح وقته  
سامحني عقلي كان سارح  
وصلت لحالة من النشوى  
تحلى بحرك المالح  
وجودى كتير على الهامش  
عملى مناعة طبيعية  
كرهت سلامة النية  
ناديت على قاضى ومحامى  
نصبت محاكمة شخصية  
مأجلتش ومدافعتش  
عجلت بالحكم عليا  
هعيش وحدي وأموت وحدي  
وأعاقب روجي بايديا.

# ورق الفرحة

مصنوع من ورق الفرحة

قلبي فتافيت احلام

دكتور امراض الدنيا

ومعالج كل الاوهام

مؤسس فن

طنشها

ومخرج فيلم

مش فاكر

مش فاكر حد جرحني

حد بيتمنالي الشر

حد كارهنى حد ظالمني

مش فاكرني

مش شاغلني

بأي حاجة بتضايقني

نور فجر كل يوم

لحظة ميلادي  
ساعة مايجي النوم  
بنسي الحياة قبله  
مسامح اي حد من قبل ما أقابله  
أنا طفل بكرة هيتولد  
اذا أذن ربه.

# مرض نادر

مرض نادر

بيقتلني ومش قادر

اعبر عن اللي جوايا

وعارف دائي

ودوايا مفيش منه

مرضي ساكن في الخلايا

في تكويني وشرياني

ومجري الدم

يضخ السم في قلبي مبتكلمش

مريض بيها

ومش عارف اطيب منها

ولا ابطل كلام عنها

ولا احكيها

بشوفها لسه و كلامها

وصوت ضحكتها مفارقنيش

كأني لسه بسمعها  
خايفة قال تسيبلى صورة  
تفكرنى باوجاعها  
نسيت نفسها فيا  
وعمرى ماهشتكى وداعها  
ولا تسمعنى مرة بقول  
ياريت ارجع في يوم ليها  
برغم اني مريض بيها.

## خسارة

خسارة بيان عليك يائس  
خسارة الضحكة بهتانة  
خسارة نقول ضعيف سلم  
ونزلت صورته جوانا  
خسارة ضحكته كانت لحن  
واحلى غنوة في غنانا.  
خسارة شوقته معرفتوش  
حتى صوته متغير  
خسارة عيونه مكسورة  
واقرب حاجة ليها الدمع  
وثقته بنفسه معدومة.

بيتحجج بكثر القمع

يامهزوم قبل ما تحارب

ملكش في الطموح والحلم

ياقشة نسمة كسرتها

دموعك عار على جيلك

مفيش في الحلم شيء من السهل

خسارة العيب في تعليمك.

# فرصة

فرشة كانت محتاجة فرصة

ترسم الخطوة الي جاية

رسم حر بدون مجاملة

مش هترسم صورة كاملة

مش هتعمل مني حاجة

مش هترسمني الضحية

رسمة افرح فيها حبة

وابكي الونها وخطوطها

رسمة حلم وهفضل احلف

اني معرفتش اشوقها

رسمتي بخطوط رصاص

رفضت الالوان تزورها

هي مش لوحه وخلص

بكرة نفهم من خطوطها

خط مرسوم زي موجة

زي خصلة في شعرها البني الجميل

خط فاصل يوم فراقها

يوم ما بعدت

ضيعت حلمي الجميل

حقها الالوان تخاصم

لوحة مفياش حتى روح

لوحة نص خطوطها جرح

حد بيلون جروح.

# كردا كيب

نسمة تلمس خد وردة

قلبها يميل من الفرخ

بين كف ايدي

عارفة ان جاي اقطفها واديها لجبيبي

جوه كتاب

في قلب اوضتي

الوردة دبلانة وناشفة

بتحكي ذكرى

ونظرة ابويا اخر مرة منستهاش

حضني وشد على كتفي

وقالي ايام وهيعدوا

وكانت بسمته قوة

هداني القوة من عنده

وكان لازم يفكرني

بحاجته في اوضتي اشيلها له

ولو حتى تكون كرايب  
وفي الاول يكون صاحب  
يعدي فينا يعرفنا بتفاصيلنا  
يكون صاحب بدرجة اخ يقتلنا  
ويمشي في الجنازة اصيل  
برنس ميفوتكش جميل  
وغلطة عمري معرفتك  
فاكرك من صورة قديمة  
لقيتها في قلب كرايبي  
مبنساش اللي يجرحنى  
وده عيبي

نسيت صورتها جنب اقلامي وورقي  
كنت ناوي اكتب كلام  
معناه نسيتها  
لقتني بكتب عنها  
بوصف في ضحكتها.  
نسيت صورتها قصدها  
عارفة اوراقى وقلمي

دول حبابی بعدھا  
فجانی حلم فی قلب طفل  
یشبه تمام حلمی  
نسیت مانا جوایا طفل  
لکن نسیت حلمی  
لسه بشوفه فی قلب اوضتی  
جنب ورقي  
جنب صورة الحبيب  
لکنی لسه بقول علیهم  
دول حاجات کراکيب.

obeikandi.com

# أمير طيبة

أمير طيبة

وعندي النيل بفرعينه

ومعبد في مدينة نصر

تشطيب لوكس بجنيينة

ترضي يا أميرة الكون

تكوني عروستي الزينة

موافقة ياسيدي من مجنون

هيرفض عرضك المغربي

خلاص هبقى معاك دوغري

انا لأأمير ولا اعرف حاجة عن طيبة

وحتى النيل

بنشحت منه من الخيبة

وعندي مسله ساكن فيها لسه ايجار

بنام واقف

ومش مستنى ردك ايه

انا عارف  
انا قاصد اوضح فكرة لامي  
من خوفي  
اقولها مباشرة ازعلها  
فقلت اكتب سطور من الشعر  
لأنا ولا هي نفهمها.

## دستوري

واحيانا بغمض عيني والواقع

بكون رافضه بتفاصيله

وبعمل ليا دستوري

وقلبي له قوانينه

مدينة قلبي بتسعني

انا وحلمي وتفانينه

جناني سرموهبتي

وطفل ساكني عارفينه

مالوش في الكذب والتلوين

بريء وقلبي حاسدينه

عشان عاش الحياة لعبة

ومش لاقى منافسينه.

obeikandi.com

## افكار جويل

مشيتي ورا افكار جويل

في كحل العين والونها

وبيعقد حبيتي كثير بيلبلك

انا عاشقك بدون مكياج

حبيتي ارجعي لعقلك

واقولك شيء كثير مهضوم

بحبك لو تقوم من النوم

وبعشق شعرك المنكوش

وعينك حلوة من غير لون

وشايفك قمره في حجابك

تغيير منك عيون الشمس

نصيحة تهدي ألوانك

لواحدة كل احلامها

تبقى بس في جمالك.

obeikandi.com

## مغروره

ياريتك كنتي ما كنتي

ولا اتحبيتي وحلمتي

ياريتك كنتي من وهمي

خيالي كل تكوينك

ومالكيش في الوجود عنوان

وانا مجنون وكوتتك خيوط من وهم

انا راضي اكون مجنون

خلقك من العدم عقله

وصورله هواي جنون

وفتحلك ببيان قلبه

راضي ان اكون مجنون

ورافض ان اكون ضلك

ماليش في الدنيا غير حلمك

وشايف بس من عينك

جنوني ساعتها حرية

سنين بتشكلي فيا وبتلون بالوانك

حاجات طول عمري بكرهها  
بقيت بعملها علشانك  
وعارفة الحال وصل بيا  
بشوف صورتك مكان صورتي  
مرايتي بتعكسك انتي  
كأني صخرة في مدينتك  
بتنحتى فيها على كيفك  
بقيت حدوده تأليفك  
بمثل كل تفاصيلك  
وخطوة بخطوة انا وراي  
قالولى العشق لحبايب  
يكملوا بعض  
كملتيني لغتيني  
كنتي السؤال والرد  
وانا جملة على الهامش  
قوليلي ازاى  
نكمل بعض  
وانا في عينيكى  
مش عايش

# قبل المطر

جمعت كل الذكريات  
حافظ كلام امي تمام  
وراجعت اه كل الحاجات  
تقل هدومك

واوعي تنسى الباطو والشال و الكوفية

بس قبل كل حاجة

فاكرها هي

هي الي من غيرها المطر

يخاصمني يجرحني

ميعديش في قلبي

يحرمني من الفرحة

الي دايمًا بستناه عشانها

هيجيب منين الفرح

لو هي مش مكانها

حبيبتني صوت المطر

شعر وكلام فيكي

قصيدة نازلة من السما

توصف حلا عنيني

تحكي حكاوينا الكثير تحت المطر  
وازاي بيملانا الدفا  
والحب حوالينا  
صحيح مغرقنا المطر  
غرق ملامحنا وايدينا.  
لكن عيون حبيبتى شمس  
باقية تدفينا  
حبيبتى مش ناسي المطر  
فرحة عينيكى  
صوت ضحكتك وانتي بتجري  
مجنونة طفلة صغيرة  
بتشد ايدي بلاش تروح  
ادعي معايا باب السما مفتوح  
ربنا ما يحرمنى منك  
هوه فيه فى الدنيا واحدة لو تشوفها  
تعشقها غصب عنك  
واحدة ممكن المطر ينزل عشانها .  
واحدة كل حاجة حلوة  
عارفة تعملها فى اوانها  
واحدة يسوى كل عمرك  
لحظة واحدة من جنانها

## أنا شاعر عينيها

انا بحكي اللى في عينيها  
بترجمها وأقول فيها  
كلام متقلش محصلش  
ماعشك قد رمل البحر

في بحر العشق  
لو شفتي الرمال امواج  
وبحر العشق لو أشواق  
يدوبك نقطة في جبينك  
ومش راضى أقول فيكي

كلام قاله شاعر تاني  
عينيكي علموني الشعر  
بقيت بوصف بالحاني  
كتبت من الاغاني الووف  
ولسه برضه موصفتش  
حبيبتى طلتك بكسوف

بتحرق شعري مكتبتش

مكتبتش عشان شيء

رسمتك بس بكلامي

وشفت الرسمة دي ولا شيء

وانتي حقيقة قدامي.

# عصر الدولة الغبية

أنا الفرعون مفيش غيري  
انا اللي مفرق القطرين  
وهحبس مينا لو ينطق  
أنا الظالم ماليش مبدأ  
انا الداھية في تفكيري  
في ثانية اخربها وأقلبها  
وقبل ما أسببها  
أبشر شعبي بالخيبة  
أنا الموهوب  
في زرع الفتنة جواكم  
انا اللي كل انجازي  
كلام شعراء في أغانيكم  
أنا اللي ياما كرباجي  
شبع فيكم ومدحتوني  
وأشكل فيكوا على كيفي

وأمد ايديا في جيوبكم أخذ قوتكم

تغنولي

وفي الاخر يجي مجنون ضعيف منكوا

بيسألني

يافرعون مين فرعنك؟؟

وانا بأيديكم عملتوني

## شهر يار

بلغني ايتها الملكة السعيدة  
ان مفيش دم البعيدة  
بكتب في امك شعر وقصائد  
وانتي كأنك حثة حديدة  
فهمك بطيء  
عاملة عبيطة  
مش حاسة اصلا  
انا نفسي افهم  
بنت اللذينة غامضة  
وعينيها قد المدينة  
وانا تهت فيها مش غصب عني  
انا شهر يار  
والعادي اني اعشق عينيها  
فقعت مرارتي  
مفضلش شيء معملتهوش

كتبت شعر عامي وفصحى  
وصفت فيها حلمت بيها  
فهموا كل اللي حوالها  
قد ايه مهتم بيها وهى لسه  
هى تبقى احلى كارثة بمر بيها  
وارتفاع ضغطي وحرارتي  
كل انجازات معاليها  
هى الوان كل حاجة  
والحياة من غيرها سادة  
فاكرة كل تصرفاتي معاها عادة  
عندي احساس بانهيبار  
عندها شوية بلادة  
مش بايدي الاختيار  
اصل حبتها بزيادة .  
فيها ايه مش عند غيرها  
فيها حاجة حلوة مني  
فكرت كثير ان اقتلها  
ساعتها تاخذ بالها مني.

# فراق

رغم ان الفكرة بقت واقع

لسه رافضها

رافض اعيشها او اصدقها

الي انا عشت كثير اعشقها

جه دلوقتي وقت فراقها

ياترى بتقول نفس كلامي

حلمها لو نرجع يوم ثاني

ولا الواقع برضه هزمها

مش راح الومها او اكلمها

رفضها مش هيغير شيء

هفضل برضه بعيد انا عنها

واقبل بالواقع بمزاجي

عمر خيالي برضه قصير

هقبل بالواقع واتغير

وهمثل ان انا مش فاكرك.

لا هقرب خالص من صورتك

ولا عمري هكرر في كلامك  
ولا همشي في شارع مدرستك  
ولا هاجي حتى في احلامك  
وهمثل حتى اني كرهتك  
مش فاكر حاجة حلوة في سيرتك  
مرتاح والدنيا مصلحاني  
من بعد قرار ان أنا سبتك.

# هي الحلم

ماليش في الحلم غير الصبر  
ونظرة اخيرة من عينها  
معاك في السكة للاخر  
عقلي وجعني من التفكير  
ومش فاكر  
غير لمعة عينيك السمر  
انا المجنون وتايه في بلاد الله  
وماسك لسه في ايديها  
طفل وعمره بالايام  
في وقت ماشفها وعرفها  
بيسرح فيكي يكتب شعر  
يموت من الخوف  
في بعدك حتى لثواني  
ومش مكسوف  
اقول امي واختي وبنتي وحييبيتي  
وصاحبي اللي ميتعوضش

وكل ضحكة بضحكها  
معاني بحس باللمة  
وعايش كل حالاتي  
انا غلطان فسامحيني  
مبعرفشني اوصل ليكي احساسني  
شاعر عادي على قدي  
طبيعي حبيبي اكون ناسي  
كلام متقلش في عينيكي  
ولا عمري هكفي كلام  
حبيبي النظره في عينيكي  
شعر لميت سنة قدام.

# فيضان

أملك فيضانا كلمات

أكتب من الشعر قصائد

وأسطر كل الابيات

وكأني شاعر بالفطرة

واما عينيكي بتيجي في عيني

بتحول أخرس

ولفترة

برجع طفل ما بتكلمش

وتلومني اني مبنطقش

وانا وحياتك نفسي انطق

واجي قدامك مبعرفش

obeikandi.com

# غنية للفرحان

وحشني هواها  
بتعلم باحساسها  
اكون قادر واطمرد على نفسي  
وارسم ضحكتي علطول بضحكتها  
واكون فرحي من صوتها  
واتعلم اكون طيب  
واكون غنية للفرحان  
واتغزل في ضحكتها.  
واقول للدنيا والعالم ...  
دى نصى التانى والاول  
وحلمى الجاي والماضي  
وبعشقها ومش بحكيلكوا على الفاضي  
ده انا بستنى فرحتها..  
واحس بفرحه الايام.  
عشان عايش في دنيتها.

obeikandi.com

## الوحدة

نقل دم لقلب واحد  
درجة الاحساس بسالب  
فاقد الروح والشعور  
صنفوني قلب جامد  
وسط مليون الف نسمة  
قلبي حاسس برضه وحده  
شايف اقرب حد ليا  
في المسافة 100 سنة  
كدبونى وقالوا شاعر  
شغلته هي الغنا  
شفنا ناس ياما في حضنك  
حد بيخبي الهنا  
وحده اصعب من العادية  
وحده وسط ناس عادية  
انت اخر همهم  
وحدتي مع نفسى طبعا  
احلى بكتير منهم  
صدقوني لما اقول  
مش شايفهم كلهم

obeikandi.com

# مواطنن

انا مواطن وساكن قلبها وعينها

ومن غيرها ماليش عنوان

ولا اعرف روجي من غيرها

انا المرسوم باحلامها

ملامي صورة قدامها

بتوصفها عينها وبس

وعينها بس تعرفني

وتعرف امتي بتام

وعارفة ايه راح اتكلم واقولها ايه

متحاولش مش هتفهم

هي كيما بينا

ربك بس يعرف هي ايه

هي تبقي نص قلبي

وابقي ليها نص دنيا

هي مجنونة وجميلة

هي مكسوفة جريئة

كوكب الاحساس مكانها

وانا مواطن فقير غلبان

وساكن اوضة والجدران

بنيتهما بشعري وقصايدى

وكلمة قالتها وانا عيبى

اضيع من كلمتين بحنان

.وهى طوفان من الرقة

نسفنى وكسر الجدران على قلبي

وضعت وعشقي كان ذنبي

بقيت اسير عينيها

واتنصبت المحكمة

وفى قلب سجن الهوا

بصرخ بعلو الصوت

ذنب ومش طالع ياهوه

لا عافية ولا بالزوق

وطلبي من قاضى الهوا

حكم مؤبد 100 سنة

وحكم اشغال حب شاقة

في عيونها ولا احس بمشقة  
وحلم قلبي القى شقة...  
تكون في شارع قلبها  
افتح عيني اضمها...  
واتعلم الحب بصحيح  
واطير لابعد سما  
واسرقلها ضحكة  
وقبل ما تنده اكون  
اقرب قريب  
ده يبقى بالنسبالي  
تعريف كلمة حبيب.

obeikandi.com

## صاحبي

معرفش اتخيل حياة من غيره  
حاجة زي الشمس متعود اشوفها  
حد زي مايكون جزء مني  
عقل جوه عقلي بيفكر معايا  
يدوب افكر هوه بيكمل كلامي  
هوه بيكملني اصلا  
باقي كل شيء ناقصني  
اللي يفرق بينا اسمي  
هوه يمكن نسخة مني  
له معزة جوه مني  
زي اخويا وابن امي  
وانا مفتكرش اخترني ولا اخترته  
انا اللي فاكراه اتولدت لقيته  
انا اللي فاكراه  
لمه كانت ورا بيته  
صوت ودوشة كتير

وقت لعب الكورة  
اجرى عدى وشوت  
لسه كام على الفورة  
وطي صوتك يابني  
احنا جنب البيت  
واللي معروف طبعا  
اني لسه ماجيت  
وده وقت درس العربي  
والا مش هبات في البيت  
لسه فاكر ضحكنا على كل حاجة  
حتى موقف فيه سذاجة لحد فينا  
ضحكنا على روحنا اكثر  
تفتكر اخترنا بعض  
ولا باين ده المقدر  
هوه في الدنيا دي سندی  
ادوس براحتي  
اخبط في الدنيا واعدي  
يسالوني سر عندي

ارد اقول صاحبي جنبي  
يقويني  
عامودي الفقري وجبيني  
وايدي في ايده بيعيني  
اثور واغضب  
واقول في كلام ميتقلش  
لو اخويا مش ممكن ميزعلش  
بس هوه بيتحملنى  
هوه سطر في قلب حلمي مايتقريش  
و لا يبقي حتى لحلمي معنى  
ولا حتى ينفع بعده اعيش.

obeikandi.com



لو يرضي يكون حلمي  
بحب الحلم لو يرضي يكونني  
يكون اسمي وعنواني  
كيان وشكلي ومكاني  
يكون قلبي ودقاته  
يكون ابني بحركاته  
يكون شاعر يكون ساحر  
يحول دمعتي افراح  
بحب الحلم  
واقمني اعيش احلام  
اكونها واكون منها  
تكون مني  
في ابعد منطقة في قلبي  
وادفي مكان في احساسي  
بحب حلمي

بحر عالي مالهوش اخر  
موجه عاتق تملی ثاير  
رافض الريح والنسيم  
رافض الظلم في نهاره  
عنده عدی صعاب طريقه  
حلمه عنده شيء عزيز  
بحر قلبي مالوش عزيز

# مخترتهاش وطني

انا الاحلام

انا منها

انا لونها وضحكتها

انا السهل الي متعداش

انا الصعب الي لسه مجاش

انا المارد بهد الكون

واضعف حد ممكن اكون

وخصلة شعر مجنونة

بتيجي برقه على عينها

انا منها

مخترتهاش وطني

ولا كنت ساكنها

هيا الي ساكناني

لوحضني رافض حضنها

تحضني غضب عني

ومكان باقي في حضنها  
وماليش مكان ثاني  
انا رافع راياقي البيضا ومسلم  
عشان تسمحلي اتكلم  
انا الطفل اللي راح صوته  
في نشيد ليكي  
انا اللي اتخلي عن حلمه  
وحلم ليكي  
انا اللي روحه على كفه  
بيفديكي  
تروح روحي  
ولا الملح دمة في عينيكي  
مخترتهاش وطني  
ولا كنت ساكنها  
هيا اللي ساكناني  
لوحضني رافض حضنها  
تحضني غصب عني  
ومكان باقي في حضنها  
وماليش مكان ثاني

## وزارة عدل احلامي

حكاية حبي دي حكاية  
في شارع قلبي بتمشي  
رايح شغلي  
طريق زحمة وانا مكمل  
ومهما تعبت  
هتحمل  
ما أنا بمعجزة اتعينت  
في وزارة عدل احلامي  
وزارة عدل احلامي  
هتلقى هناك عالم تاني  
حوادث جرح قلب وعنف  
وناس اشكالها مطمئش  
ده مجرم حب  
ده خاين للوعود والقلب  
ده سايب قلب دايب فيه  
وعاشق حد جرح فيه

ده عايش للخيانة وبس  
ده دايب فيها بس تحس  
ده قلبه ملف وقضية  
ده عايش قصة منسية  
وابصلهم كتير واضحك  
وبستغرب على حالهم  
واقول مرضى  
يجولى يعملوا معارضة  
عشان مشتاق عشان ندمان  
عشان خايف على الاحلام  
عشان في البعد بيعانى  
عشان الحب دوبهم  
عيال طرية  
بجد زهقت من حالهم  
والمكتب لازم ينصف  
زعت فيهم  
ايه يارجالة مش هتنشف  
ده حالى قبل ما اعشقها واجرب حب  
عشقت ازاي؟؟?  
دي حدوته ومعرفشي انا احكيها

انا اعرف احكي بعديها  
صوت رقيق الصبح بدري  
يقولي يالا روح لشغلك  
مكاملة تفضل لما اوصل  
طريق الزحمة يفضالي  
واوصل يدوب  
دفر حضور الشغل ارسم فيه قلوب  
وابوس في رئيس القلم  
واضحك لمجرم نفسه يخبطني قلم  
واشوف بعيني ان الحرامي اكيد شريف  
كل الا دي ده قمة التخريف  
اصلي عاشق  
كل حاجة في عيني حلوة  
هي قدرت توصف الاحلام في غنوة  
وزيرة عدل احلامي انا دايب في ضحكتها  
ياريت تشاركني ايامي  
وانا همسك قضيتها.

obeikandi.com

# مفیش أسباب

عشقتها على ايه.؟؟

يمكن عشان رقيقة

صافية طيبة

يمكن عشان كل حنان الدنيا

بس في نظرة منها

يمكن عشان بتحسي بيا

قبل ما احس بروحي حتى

يمكن عشان برتاح

وانا بسمع كلامها

تقدر تقول بستنى

اسمع اسمي منها

كل الكلام حتى الكلام القاسي

حلو منها هي

هي مش كل اللي قولته

هي اكثر من كلامي  
هي احلى من صورتها  
هي اجمل من الاغاني  
اللي قالك ان مرة في يوم وصفها  
هات خياله  
هاتلي شعره  
هاتلي كل حرف قاله  
وشوف عينيها  
وارمي اوراقه  
وقال لي  
هي اصلا تتوصف  
هي حدوته جميلة  
هي بس تحكي روحها  
واحنا نسمع منها

## رصاص الغدر

رصاص الغدر ميسألش

مين مسلم ومين قبطي

رصاص الغدر انا شوفته

بيتلهف على حبيبي

عشان مشتاقة حرية

عشان متعلقة بيا

وشايفة خيال صلاح الدين

ونوره بيضوي في عنيا

ده ذنب وتهمه تستاهلي

تموتي عشانها يا حبيبي

وبيلومك

عشان بتحبي وعيونك

بتتغزل في احلامي

وصوتي وشكلي وكلامي

ويستغرب اوي لما

يشوفك رافضة احضاني  
وديسانى فى موج همك  
ومطحون قلبى ويضمك  
ما انا لو كل جسمى يموت  
هتفضل حته بتحبك.

## آخر واحمد

انا اخر واحد يشعرك  
ضاع من كلامى فى موج همك  
مكدبش حاولت اهرب منك  
ضاع مني كلامي فى موج همك  
مكدبش حاولت اهرب منك  
وارضي بشمسي وارفض ضلك  
واشيل من دمي كرات دمك  
واحللمي وابطل احلمك  
منكرش نسيت حتى ملامحك  
وفي عيني اتغير لون قمحك  
واتغير قلبي عشان خاطرك  
مش لازم القى دموع منك  
عشان ارجع تاني اسامحك  
وعشان تفتحي حضن لابنك

obeikandi.com

## عروستي

حلمت بيها تكون عروستي  
وحضن حلم يضمني  
وكان وصولي لحلمي  
حلم والفاء اه بتهزني  
حلمت اشوفها في ابهى صورة  
عشانها هعمل اي حيلة  
حلمت اشوفها اميرة عالية  
بس مش من يوم وليلة  
هلاقي احلامها الجميلة تحسني  
يدوب ده حلم تكون عروستي  
وحضن حلم يضمني  
وفي عز حلمي ونشوتي  
لقيتها بتضيع من ايديا  
صرخت قولت لا ياغالية  
ماليش حياة ولا حضن غيرك  
ولا هلقى حب في واحدة تانية

ثورت ساعتها قلبت الدنيا  
ياحبيبتى مش هتبكى تانى  
لو روحى راح تبقى الضحية  
عرفت اشوف بكرة بعينيكي  
لونت نيلك لون جديد  
بنيت حضارة  
مش مومياء ولا قصر وحجارة  
رميت لحلمك طوق نجاة  
مش قصدي تديني الامارة  
ولا قولت فلتة وفيلسوف  
انا كنت طفل عماني خوف  
وفوقت على بيعة بخسارة  
وشوفت نهاية ليكي  
نهاية كانت متلقش بيكي  
عملت انا لربي استخارة  
وقالي ربي اعدي بيكي  
وهى ليك هتكون منارة  
مديت ايديا ايدها بشوق بتشدني  
حلمت بيها تكون عروستي  
وحضن حلم يضميني.

# الماريوننت

وداع يادنيا الماريوننت

مسرح عرايس دولتي

كل يوم في عرض لينا

اما العرايس حضرتي

واي حد له حلم فينا

كل يوم عرض في مدينة

والخيوط وزعها سيدنا

على كل نصاب في المدينة

اوبريت ولا الليلة الكبيرة

واحنا ولا كان لينا حيلة

علمونا في صغرنا

نرسم الضحكة الجميلة

ضحكة بشد خيوط من ايد سيادته

دمعة بتنزف مووت

شفافىفى نسىت حتى ايه طعم الكلام  
احلامنا صورة مزيفة واوهم  
وفىنك ياحرية  
فىنك وايدى مكثفة بخيوط سيادته  
حرام حتى الكلام  
لكن كفاية الليلة دي العرض الاخير  
على مسرح الدولة الكبير  
رواية من اخراجى انا  
وداع يادنيا الماريونت  
مش ضعف منى عشان سكت  
ده بس تمهيد للطوفان  
همحك كانك ما اتولدت  
اخذتني من حضن امي  
فاكرني من يومها اتهزمت  
بايديك كده حطيت نهايتك  
مخنوق بخيوط الماريونت.

## (العنوان)

ميلاد جديد

سرقوا احساسه وبكرة

نسفوا احلامه وارادته

جرفوا ارض المشاعر

كسروا في حيطان كرامته

بس لسه متهمش

قالوا مفيهوش النفس حتى لكلام

خييب ظنونهم ده الولد

اصبح همام

لو حتى راح منى النفس

عندى الامل

وطوفان بيغلى من الالم

بركان وكان محبوس في داره

بغباؤكوا

عجلتوا انفجاره

هساويكوا بالارض في ثواني

وارصفكوا جسر طويل لحلمى

هثور واحاسب كل جاني

كسربي

واستهتر بقلمي.

## معاولة جبرية

مساحة ارض احلامى

فى حاصل ضرب كل الصعب قدامى

فى اس اتنين فشل دايمًا

فى جزر كبير امل فاضل

بعيش واتمنى بيساوى

اكون فرحان

وشوفت حبيبتى فى معادلة

وكانت النسبة متقاربة

وروحت لابوها ورسملى

مثلث حاد اضلاعه

وسمى الضلع ده شقة

وسمى الضلع ده وظيفة

وسمى الضلع ده شبكة

وانا والله من الربكة

خلاص عرقى بقى مياه

رسملى زاوية فى مثلث

وقالى هاتلى عربية

اروح واندهله اقليدس

دى قعدة عايزة نظرية

شايفنى قدرت على الشقة وعلى الشبكة

وراح يطلبلى عربية

خرجت بادبى منطقتش

وعالم واحده بالنية

وحتى قلبى اقنعتنه

دى مش قعدة جواز لكن

دى بس معادلة جبرية

# خريطة قلب بنت

خريطة قلب بنت

خطوط طول وعرض

صحراء وساحل وبحر

غابات وطرق معاكسة

لازملك ليها بوصلة

عشان توصل هناك

خريطة قلب بنت

مالهاش خط استواء

ولا ليها سكة سهلة

دى اوسع من الفضاء

ممکن بحاجات بسيطة

توصل لمينا قلبها

وممكن تضيع يا صاحبي في اول شطها

خريطة قلب بنت

رموزها في حضن وردة

وفك الشفرة ليها  
كلمة حب صادقة  
واقصر خط جوى تاخده لقلبها  
تروح مطار مشاعر  
تحجز درجة اولى  
رحلة احساس جميلة لدولة اعشقونا  
هتلاقى الجو هادى  
وسحاب اسفلت صافى  
مستنيك حزن دافى  
هيشيلك جوه عينه  
خريطة قلب بنت  
وقعت فى ايد قرصان  
وفاكر نفسه جامد  
وحبيب من زمان  
عايز يتسلى يضحك  
مشاعرها تكون رهينة  
عارف يا اخينا قصدك  
وخط السير كمان

تروح ساحل مخادع  
تشوف سفينة الغدارين  
ناقصها حد ولا كده كاملين  
وحجز درجة تالته  
ملقتش اهوه اى بطة  
برضك عارفة الطريق  
تركب على ظهرها  
وان شاء الله غريق  
ولو وصلت حظك لدولة غشاشين  
هتلاقى الجو عتمة  
وليلة سواد وطين  
وواحد جتة واقف  
يشيلك بين ايديه  
ويطلع ابوها عارف  
وياخدك فسحة ايه  
وخریطة قلب بنته  
هتطلع من عينيك.

obeikandi.com

## بحار جزيرة قلبها

بحار جزيرة قلبها  
احساسى مجدافى  
مملكش غير قلبى انا  
وحضنها الدافى  
طريقى صعب لقلبها  
والبحر على موصفوش  
لكن حبيبتى مبتخافوش  
اى ربح بتهزها  
بشوفها نسمة تطير شعرها المنكوش  
عيونى حافظة اسمها  
لكن شفائفى مبتقولوش  
مبقولش غير حيبى  
حد تانى انا معرفوش  
بحار جزيرة قلبها  
مملكش غير هدمتى

وزوادی المشاعر  
ومیتی دمعتی  
لو اضیع و حتی اموت  
مش هغیر سکتی  
ومین اعز منها  
اضحی لیه بدنیتی

## زى المطر

احلام كثير زى المطر  
فى نزولها وضياها هدر  
والحلم لو كان يفتكر  
عشمنى انه هيبقى شىء  
ورسملى افراح فى الطريق  
قالى شوف  
الحلم تجرى فى سكتة  
لازم يقابلك فى الطريق  
مش حبال داوية  
الحلم قشة من حديد  
قادرة تنجيك لو غريق  
صدقته ومشيت فى الطريق  
ضيعني ضيع كل شىء

obeikandi.com

## حبيبك

حبيبك حنة منك  
نسمة مشبعتش منك  
ولا حاجة بتعشقتك  
انا كورة دم في شرايينك  
انا خط اتحدد في جبينك  
انا سامعك من اوتار صوتي  
انا ساكن قلبك بشروطي  
بتشكل شكلك وملامحك  
وبريشتك يتحدد موقتي  
لو مرة الحبر في قلبك جف  
مين راح هيلون احلامي  
وهشوف ازاي جدران قلبي  
منقوشة بصورتك وكلامي  
محتارة عيونك قدمي  
استنى الشمس وهتجاوبك

انا واحد مخلوق جواكى  
انفاسى منبعها هواكى  
ولا عمرى اتنفس من غيرك  
دى خلایا مشاعرى خطوط ايدك  
ومصيرى سلمته فى ايدك  
ومفیش حد قابله وقالى  
ليه مسلم لعنيها تلى  
وتملكها اوامر قلبك  
مين يضمملك هتصون حبك  
وتعیش بحكاوى حنان حضنك  
وتموت جنبك  
مش هتصدق لو هحكىلك  
هتقول ملاك على الارض بينا  
معذور محبتهاش قدى  
ولا عمرك هتشوفها بعينى  
انا شوفتها أميرة  
وحلمت اشوف فى عينها حلمى بيت جميل  
واموت فى لمس ايديها

واتعلم حنان  
والله على الحضن منها  
احساس طعم الامان  
معرفش راحة غير معاها  
ما احنا عشرة زمان  
احلامى اشوفها بفستان الفرحة قدام عنيا  
عمري ما اتخيلت غيرها يبقى ليا  
امنى قلبى حاجات كثير  
واستنى تيجي اللحظة ديا  
احكى حكاوى حبنا بقى للولاد  
لاروميوحتى قدنا ولا شهرزاد  
حبيتها من يومها انكتبلى  
تاريخ ميلاد.

obeikandi.com

# ملك شطرنج

جناب ملك شطرنج

عرشك من ذهب

تشوفه بعين غرورك

ده اصله لوح من خشب

اما العساكر بآشارة من ايد حضرتك

يمحو الصعاب من سكتك

عشان تشوف الدنيا تمام

وحاجة جاهزة وبالالوان

خسرت حاجة خسرت كام

ماهى بالفلوس

اما النفوس عندك كتير

شغل ياسيدنا

فين الضمير

دايما بسببه تحت السرير

عشان لايسأل ولا يعاتبني

مابدالى اعمال  
مين هيحاسبنى  
حقك ياسيدى  
حقك ياسيدنا  
تؤمرنا حتى وتستعبدنا  
ياريت يكون عندك خبر  
ان احنا زيك من البشر  
احساس ودم  
مش زيت وشحم  
واله بتروس من حديد  
يارتنا الة نضمن راحتنا  
يمكن تخاف على كهربتنا  
بس احنا بنى ادمين ولادتنا  
تشبه ولادة حضرتك  
الفرق تشريفك عزيز  
صدقنى لو عندك تمييز  
هى اللى فارقة بس المشاعر  
ترتاح معايا واحب اشوفك

فرحى فرحك خوڤى خوڤك  
ليك مكانة طيبة قى قلب كل الناس  
تلمسها بكلمة حلوة  
قريبة باء حساس  
تكون مصدقها  
يعنى مش ورقة فرمان  
بسيجارة تحرقها  
ولا هيلامان زايڤ كمان  
كل اللى فيه مجانين فى سيرك  
عندك اصول تعرف تصون  
احلامنا ولا الحلم شرك  
افهم ياسيدنا  
ده العقل زينة  
مانتاش حاكمها  
دى صورة زينة  
والى حاكمها ولاد اللذينة.

obeikandi.com

# اكتشاف

قلب ابيض

ميفكرش يتلون

ولا يجامل ولا ينافق

ولا بيحسبها لو حبك

يموت نفسه علشانك

ومش مجنون

ده عاقل مخه قد الكون

لكن حساباته مختلفة

ميعرفش يبيع ويخون

يفسر كل افعالك بحسن الظن

متستبعدش انه يحن

لواحد جرحه فيصالحه

ويتاسفله على غلظه

وهوه اللى معاه غلطان

متستغربش على حالته

عشان جواه صحيح انسان

obeikandi.com

# فرحان

فرحان ومن غير سبب  
ضحكة وطلبتها طلب  
وجاتي في ميعادها  
رجعت تاني ولد  
ميلاده بميلادها  
اسعد قلوب البشر  
بضعف اوجاعي  
وماليش دلال على القدر  
يشرحلي ايه الداعي  
مجنون واعمى النظر  
سلمتله تاني  
فرطت في الضحكة  
ودلوقتي وحشاني.

obeikandi.com

# ماضي

بعد اسمى وبعد حلمى

بعد احساسى وخيالى

بعد اى شىء فى بالى

تيجى انتى

بعد كل حاجة صعبة

بعد كل حاجة تافهة

انتى بعد ما اعيش هعيشك

انتى وقت لازم يضيع

انتى حالة عشتها ندمان عليها

مش فاكرها

وذكرياتها قضيت عليها

انتى فرصة عرفت فيها انا قيمتى ايه

انتى ندمك كل ندمك بعد منى هتعرفيه

تحلفى بحياتى انك

كنتى فى الجنة وخرجتى

كنتى اكر حد عشقك

وانتى مجنونة ورفضتى

obeikandi.com

## صوتها

كمانجا وصوت بيانو وعود  
واحلى من نغمات جيتار  
بتنطق اسمي لحن جميل  
بصوتها الى مالوش اوتار  
وانا كالعادة خايف ارد  
تبطل نطق في اسمي  
يا أحلى من خلق على الارض  
وأحلى من نطق اسمي  
والله ما جايلي قلب ارد  
واحرم نفسي من صوتك  
ارد عليكى بس بشرط  
تنطقي اسمي بعيونك

obeikandi.com

## حبیبتی

انا الداهية الي فشل اليأس  
يدخل في بيوت حلمه  
وعدى في جبال الصعب  
وكان بضحك على فشله  
وفاكر ضحكك بالظبط  
كأني لسه بسمعها  
تدوس الدنيا على حلمي  
تكسرنى لميت حنة  
مبستسلمش ماانا عارف  
هتيجي لما تسمعني  
حبیبتی لو فی اخر الارض  
بايديها هتيجي تجمعمني.

obeikandi.com

# التنحي

قررت التنحي

عن منصب حبيبها الطيب الساذج

انا المدعو سليم النية والافعال

كتبتك في الحياة موال

ومعرفتش اغنيكي

كلام الغنوة في عنيكى

بيملى صوتى انانية

ياريتك كنت يوم ليا

نصبتى عليا في مشاعرى

وقعت في فخ حنية

سكنت قصورك الهشة

واول نسمة هدمتنى

وكنت في الهوا قشة

لكن والله ماكسرتنى

وقمت تانى وبنيتنى

وعديتلك في بحر العشق  
بمركب كان قديم خردة  
هوصل ليكي او هغرق  
بقت واحد ومش فارقة  
موته بس مختلفة  
خسارة مركبي التحفة  
يروح فيها عشان خاطرك  
يدوبك تلحقى قطرك  
رجعلى عقلى وتخيلى  
بقيت دلوقتى مش فاكرك

## حالة

لازم ببقالك سر  
حالة تعيشها مع نفسك  
وتحكي فيها مع نفسك  
تفضفض ليك  
وتحكي وتسمعك تترتاح  
قلوبنا ببيان  
مفيش غيرنا معاه المفتاح  
وعارفة ليه انا اختارتك  
عشان ولا شيء  
لو اعرف حاجة حبيتها  
وربطتنى فى يوم بيكى  
هسيبك يومها وادور  
عليها فى اى شيء تانى  
انا اختارتك عشان انتى  
ولا غيرك فى يوم انتى  
هيسكن قلبى وكيانى

obeikandi.com

# ورقة وقلم

ورقة وقلم

ومفیش کلام

الفكرة خایفة تعیش

كتابة على الورق

الفكرة خایفة اسیبها

تفضل بس حبر

تشوفها طفل

یدوبك طولہ شبر

متعلقة بیا

وانا مش ناقص هموم

متقطعیش فیا

وارتاحی من همی

واحد مالوش وطن

ولا حتی له على الحلم صبر

القرب منه خطر

حدوده كلها بحر

راحته في الوحدة

ولا حيلته غير ضحكة

ضحكة بتعكز عليها

واداري جواها

ضحكة حاسديني عليها

مش عارفين ايه وراها

متحمليش مركبي

بحمل مش قده

حلمي اكيد توصلي

والله ماانا رافضه

بس الوجد معرفش

اداره فين منه

بتقولي لساك بطل

شفتيني متأخر

نفسى اكونه صحيح

لكن ياريت اقدر.

## لوحة

انا اللوحة اللى خلصانة

وشوفت مكانها يبقى الرف

سيبها مهما تنساها

هتفضل رغم سوء الظرف

لوحة جميلة وعيوبها

انك تبقى فنانها

ولسه برضه بقيمتها

وحافضة لسه الونها

ورفك حتى مش عارف

يستغنى في يوم عنها

وانت بكامل ارادتك

خلاص قررت تخسرهما

obeikandi.com

## تمرّد

يكفينى من تلك الازمة  
تجربة جعلتنى اقوى  
اقوى من نفسى وانا امبارح  
محتاجك شايفك بالدينا  
بتحرك باشارة ايدك  
وانطق فى كلامك وحروفك  
معدوم الراى خيال ليكى  
..بتنازل علشان ارضيكي  
احتلتي مواقع قلبى  
وانا بعلن عصيانى عليكى  
رافض فكرة اكون غير ليكى  
ورافض فكرة انى اكونك  
مستخسر فى الجرح عيونك  
ليه بداويكى

وتجرحي روحك

مش فهماني

ريحي روحك

انا مرتاح طول ما انتي بعيد.

obeikandi.com

## بخار مياہ

مشاکلی جاہزۃ تتکشف

وتتحول بخار مياہ

وتبقى سحاب یمطر فرح

بیان الضی فی عنیا

وشبه اکید بکون شایف

فی اخر السکة حبة نور

واخر السکة لما اوصل

بیطلع انعکاس املی

وقلبی الطیب الغلبان

بیتعشم فی میت فرصة

وسقف طموحی بیعلی

وسقف طموحه بیعلی وبیغلی

ده فرصة كتيرة ياما عليك  
ونص الفرصة مش حقا  
وسقف الحلم متفكرش يبقى بعيد  
يدوبك يعنى فوق اوضتك  
اصول اللعبة مش هى  
لكن مضطر العبها  
وهمشى مسلم النية  
معدى فى الخيال طيار  
ومالى سمايا حرية  
وأخطى برجالى وأتأكد  
انا على الارض مش طيار  
لكنى ساعتها بتأكد  
انى مش بعيد والله  
ونص السكة انا مشيتها  
وصاحبى فاتنى فى الاول  
والبنت الى حبيتها  
فى نص السكة فارقتنى  
ومش فارقين معايا كتير

معلم بيهم السكة  
بدأت منين وصلت لفين  
رسم بياني في حياقي  
بأسماء ناس ماتستاهل  
بحط نقطها في الاخر  
ومنحنى عرضى فكرنى  
باني صح في قرارى  
وجودهم لعنة في حياقي

وثقتى في نفسى كانت هتروح  
وربى هدانى في ساعتها  
محدث عمره خاف من الملوغ  
الا وضاع في سكتها  
هرجع تانى زى زمان  
هحاول لسه في الامكان  
افرح قلبى بايديا  
وأكمل حتى لو حلمى  
كان لسه بخار مياه

obeikandi.com

# بيت الحلم

ضيعتى وقت مالقيتك

وبيت الحلم كان بيتك

وفتافيت الحنين ليكى بقت ماضى

لا عاشق فيكى ولا راضى

اكون ذكرى فى اغانيك

ولا اعشق حتى من بعدك

بقيت للعشق غير صالح

غرقت فى بحرك المالح

وقلبى طبيعى يتحلل

ويترسب شوية رمل

سامحت وياما عديتلك

وقلبى زاد عليه الحمل

طلبتى منى نص القلب

نص الحلم والدنيا

وخذتى الحلم والدنيا

وضاع القلب بين ايدك

ومش ندمان

انا الى بعمل الاحلام

وعايش دنيتي بعدك

انا الحاكم بأمر هواه

يافاكرة الدنيا مش قدك

حلمتك يوم وشفتك يااه

وهحلم تاني من بعدك

## مشروع اميرة

هى لو فهمتنى يمكن  
كان زمانها بقت اميرة  
بس فى بداية الحكاية  
بانى اختلافات كتيرة  
هى كانت عايزانى حاجة  
وسط دنيتهالكبيرة  
رغم انى شايفها دنيا  
احلى من اجمل اميرة  
رفضت المنصب بتاعى  
ضيعت احلام كبيرة  
راضية باين تبقى واحدة  
ضمن يجى الف واحدة  
بس رافضة تكون اميرة.

obeikandi.com

# فقير احساس

فقير احساس

قلبه واحة مفهاش ناس

تاجر حب وسعادة

مع انه فقير احساس

ومفهاش لغز

بينسى نفسه

ويفرح فى خلق الله

ويرسم ضحكته بالكذب

ومن طبيته يصدقها

ويقولوا فقير احساس

واحساسه يكفى الناس بكوكبنا

ومعذور يعنى لو سبنا

ما هوہ احنا خلاص  
بقینا نشوفها بحاسبنا  
مهوش انسان  
نقول ده ملاك  
تواضع عاش ما بين الناس

وانسان بس بزيادة  
وانسان بس بزيادة..  
يقولو عليه فقير احساس

# بنت جميلة

يحي ان

بنت جميلة قلبها ابيض

لسه هكمل

هي انكسفت

لازم اكمل

واهي محسوبة عليا قصيدة

ويبقى جميل

ضحكت يعنى موافقة اكمل

بس بلاش تحكى التفاصيل

هحكي عشان اشوفك مكسوفة

اصل كسوفك برضه جميل

بعد حبيبة قلبى عمرى

ننسى بداية كان ياما كان

اصل مكنش وكان قبليكي

يعنى بداية قلبى معاكى

يعنى نقولها بأمر عينيكي  
لسه هنفضل نحكي كمان  
قمره كوكب قلبى حياقي  
روحي ومجموعتى الشمسية  
كانت ضلمة قلبك يا حياقي  
ياللى نهارك ضى عنيا  
لسه عيونك صافية بتضحك  
زى ما شوفتها اول مرة  
فاكرة حبيبتى اول مرة  
ايوا

ضحكة بتشبه دى بالظبط  
هى اللى جابتنى وودتني  
وكسوفك بصيتي فى الارض  
عينك حفرتلى ودفنتني  
ايوه قتلتيني بنظراتك  
وكسوفك لازم تعترفى  
ولا تحبى احكى كمان  
لا يا حبيبي كفاية كلام

لا يا حبيبتى لسه كثير  
بحبك قد ما فرحتى  
بحبى وقت ما صارحتك  
بحبك قد ما حلمتى  
ببيت يجمعنا انا وانتى  
بحبك مش كفاية سنين  
ليكى اقولها يا حبيبتى.

obeikandi.com

## قهوة

زى العادة صاحى الصبح  
باخذ قهوق معاها  
نهارى شمسه بتنور  
بطله عينها على الدنيا  
تنور ليا ايامى  
واشوف الدنيا بعيونها  
يدوبك بيت يكفيننا  
بحبك مش بقولها كلام  
بقول احساس عايش فينا  
ملامح حد مش مهتم  
مرسومة على وشك  
سرحتى فى ايه!!!!  
كلامك كله وطريقتك  
روتين حفظاه  
و امثل انى مبسوطه

هموت من الفرحة بكلامك

ومتفجأة وانا سمعاه

كلام متعاد

ردوود الفعل بالكربون

غير مرة واعمل اى شىء مجنون

كسر فى الروتين مرة

فجانى بحاجة مختلفة

بلاش تكتبنى فى كلامك

وتوصفنى

بلاش اشعار

حب ولهفة غيرة وناز

ياعم بلاش كلام فاضى

هاتلى هدية خرجنى

هكون يا حبيبي انا راضى

ياريتك بس تفهمنى

عندك حق

انا اللى بعيد كثير عنك

وانتى بتيجى على نفسك

وعاملة تملى مبسوطة

انا مغرور

و فاتنى دروس كثير منك

عشان اتعلم الاحساس

عشان أهوى

انا استاهل

بقالى يجى ست شهور عشان اتملى فى عنيكى

بشرب كل يوم قهوة

وانا مبحبش القهوة.

obeikandi.com

## الفهرس:

7	التعريف بالشاعر .....
9	وصف حالة .....
11	الوصية .....
31	قصة شعرها .....
51	إبتسامة .....
71	ورقة .....
91	حبيبتك .....
12	واحدة طيبة .....
32	ضحكتها .....
52	أنا نسيتها .....
72	كوكب جديد .....
92	سندباد .....
13	قواعد لغة .....
33	عم فرح .....
53	شبه ميت .....
73	دولاب ذكريات .....
93	تعرفيني .....
14	انتحار فكرة .....
34	طريقة حب .....
74	حرب حياة .....
94	الكيمياء في وصف اميرة الدنيا .....
15	علم الحساب .....
55	فاكر .....

75.....	تفاصيل شخصية
95 .....	ملهاش وصفة
16.....	مجنون
36 .....	تمثال شمع
56 .....	بنت بضاير
76.....	نصيحة
96 .....	محاكمة شخصية
17 .....	ورق الفرحة
37 .....	مرض نادر
57 .....	خسارة
77 .....	فرصة
97 .....	كراكيب
38 .....	أمير طيبة
58.....	دستوري
78.....	أفكار جويل
98.....	مغرورة
19.....	قبل المطر
39 .....	أنا شاعر عينيها
59 .....	عصر الدولة العبية
79 .....	شهر يار .
99.....	فراق
101.....	هي الحلم
301 .....	فيضان
501 .....	غنوة للفرحان
701.....	الوحدة

901	..... مواطن
311	..... صاحبي .
711	..... الحلم
911	..... مخترتهاش وطني
121	..... وزارة عدل أحلامي
521	..... مفيش أسباب
721	..... رصاص الغدر
921	..... آخر واحد
131	..... عروستي
331	..... الماريونت
531	..... العنوان
731	..... معادلة جبرية
931	..... خريطة قلب بنت
341	..... بحار جزيرة قلبها
541	..... زي المطر
741	..... حبيبك
151	..... ملك شطرنج
551	..... اكتشاف
751	..... فرحان
951	..... ماضي
161	..... صوتها
361	..... حبيبتي
561	..... التنحي
761	..... حالة
961	..... ورقة وقلم

١٧١.....	لوحة
١٧٣.....	تمرد
١٧٥.....	بخار مياه
١٧٩.....	بيت اللحم
١٨١.....	مشروع أميرة
١٨٣.....	فقير احساس
١٨٥.....	بنت جميلة
١٨٩.....	قهوة

إصدارات موقع دار الكتب:

١. فيرجينيا سيكرت
٢. الفوضى العالمية
٣. طال الرنا
٤. مدينتنا غير الفاضلة
٥. على من نطلق الريح
٦. قصائد في عشق النساء
٧. ومضات من الماضي
٨. حوار مع النفس
٩. كارمن
١٠. ومضات من الماضي
١١. رياح القبور
١٢. كلام لن يفهمه غيرك
١٣. الفرنسيين والشرق
١٤. اغتيال رفيق الحريري
١٥. البحر الميت وكفة برج الميزان
١٦. العمر لحظات
١٧. ومضات
١٨. آية الله الخميني بين الثورة و الطغيان.
١٩. قبل أن أموت.
٢٠. فتاة شرقية.
٢١. كاتيا.
٢٢. شمس.
٢٣. التعلم النشط.
٢٤. نبضات مغترب.

25. رأيت الشيطان.
26. حل قضية الجبر والاختيار وقضايا أخرى.
27. لوزة قطن.
28. حياة وحنين.
29. رحيق العمر.
30. عواطف.
31. الوهم.
32. الاعجاز العلمي في القرآن الكريم.
33. تاريخ مصر الفرعونية.
34. ديوان البت سعاد.
35. الكفايات المهنية للتعليم ما قبل الجامعي.
36. الموعد
37. اذا لم تزد على الحياة شيئاً كن انت زائد عليها
38. عائدون من بين الانقاض
39. -حذاء جديد
40. حلقات مفرغة
41. يوميات طبيب في وطن مسلوب
42. أصحاب الكرش
43. جنت ورحلت
44. شخصية مصر
45. ديور... ابن الحرب
46. رجل مدخر
47. ليلة في الرنفة
48. استراتيجيات التسويق عبر الفيس بوك
49. يوميات مع نفسي

٥٠. سلسله القائد المتوازن.  
٥١. يوميات واحد فيس بوكاوى  
٥٢. نصف انسان  
٥٣. اريد ان اكون زوجة ثانية